



KEYSTONE

## Observà ina ludra al Rain alpin

■ (cp) Dapi il cumenzament da december 2009 han ins pudì constatar pliras giadas ch'igl ha ina ludra en la vischinanza da las ovras electricas La Punta Domat. La preschientscha da quest animal ha pudì vegnir cumprovada cun agid da la surveglianza automatica da video a la stgala da peschs da l'ovra electrica. Ils films subaquatics da l'uffizi da chatscha e pestga musan senza dubi ch'igl animal observà è ina ludra d'ina lunghezza da 70 cm.

La ludra, ch'existiva oriundamain en l'entira Svizra, è svaniada en nossas regiuns. La cumprova segirada d'ina ludra selvadia en il Rain alpin fiss perquai bunamain ina sensaziun. Ils ultims onns han pudì vegnir constatads en Svizra sulettamain animals ch'eran fugids d'allevaments. L'onn passà è vegnida observada e pigliada ina ludra pitschna al Lai da Murten.

Per il mument na pon ins anc betg dir, sch'i sa tracta tar la ludra observada d'in individui

immigrà en moda natirala u d'in exemplar ch'è scappà d'in allevament. Pir la prelevaziun e l'analisa dal material genetic (excrements, pail) pon furnir las infurmaziuns relevantas. Las proximas colonias da ludras sa chattan en Baviera ed en il Tirol.

Fin uss n'èsi betg stà pussaivel d'observar la ludra ordaifer l'aua. L'uffizi da chatscha e pestga supplitgescha la populaziun d'annunziar eventualas observaziuns.